

PETOLO' IZESU' ZUHO MINI'MI MONAVE GIZE-NGIDINE' LUHUVO NITE' NABA 1

Petolo' Izesu' Evenele Zuhu Naba Vanu Luhuvo
Nite' Gize-ngidingumu' Gomu' Gataa' Gamazi

Mene luhuvo nite' nene aposolo' Petolo' gizine' ve. Petolo' aza Betesaida ebekuti' ve minine'. A'mine ebe' Betesaida nene Zuda veliti mis-ubo lingela nGalilaia polovinisi ve langu' minine'. Ido' Izesu' aza olihe gulive gosoho' Keha' ve lo molo-damivo Petolo' gulive nene Simoni' ve lo minine'. A'mine Izesu' molo-dine' gulive Keha' nene do velepe' izo nGiliki aleveti gamazi'ninguti' lolone' nene Petolo' ve lo mineleseive. A'mine Petolo' gulive ne'mi monovo nene ne'mino neive: Ele'vole' ogo minaa' neine' inite' geheni ne'mine ve. Melehi gulive nene Zohane' ve. Petolokisi akunolo Adeleakisi ingine alaha' daa' asive minasine' ve. A'mine alaha' dii maketi milaa' gonou' maka' daa' ave ma minasine' nene uyolohoi akunoloi ado' Zakoboki Zohaneki ve. Ido' alaha' daa' ani' nene nGalilaia noso ohuno nabauti' disa maketi milaa' ani' ve. A'mine ve seta've seta've ingine noso holo-ngedaa' ive Zohane' izipahala lili' igi mini neloti' alinge' nene Izesu' izipahala zuho lili' ani' ve. Alinge' nene Petolo' aza Izesu' izipahala zuho muki' minanguti' aposolo' gono di hize ele' i-dilizave lo ve tuvelu'a do kegese-ngidiveuti' minine' ve. Ido' a'mine Izesu' aposolo've tuvelu'a minangu' nene Petolo' aza ve naba ne'mine minine' ve. Ido'

aza gamazi lo ogo molo ine' inite' vaikumu' nene Mataio' ve Maleko' ve Luka' ve Zohane' ve gizani' buku seta've seta'veukisi ido' aposolo' bukuukisi nene gatelesane. Pedekosi gameneu' O'moso'mi Sikalahu' ne'mo Izesu' izipahala zuhola lemo minine' gameneu' evene' vai' igi di gese' ave mono' lo-ngimive nene Petolo' ve. A'mine di gese' aveu' nene kanitili ato ato' mukikuti' ani' Zuda ve masi vai' minani'. A'mine gameneu' Izesu'nimu' gili ele'vole' igi eze evenele zuho lili' ave tili tauseni minangu' nene a'mine kanitili ato atokuti' ani' Zuda ve lingesi ne'mine ani' noloseive. Ido' Zuda ve minamave nene gana' api' ogo Izesu' gamazi've lamine' lo-ngemelive lo O'moso'mo Petolo'ni ele'mize molani' ve. Ne'mine gamazimu' nene Aposolo' tenisi ido' leveniukisi ne neive. Ido' gozopo' aka'milati' li'mi ani' gamazi ma ti' lo lo neine' ma neive. Petolo' aza Kolidi ebeta vo a'mida alevesi mono' gamazi lo-ngimine'. Ne neiha Zuda ve minamave nene Izesu' gamazi've lamine' lo-ngeme'mo mone-live lo O'moso'mo ele'mize molave nene Paulo' minine' ve. Petolo' aza mono' gono vauve elo dani' nene Zuda vetingu' ve. Petolo' aza vani molo mino Loma ebekuko vo neivo a'mida Loma vete Paulo'ni bili hilani' gamenela nene Petolo'nisi lohoto' zalo' bili hilani' ve li li'mi ani'. Ido' bili hililisa navo Petolo' aza Guvelesi ve Izesu'ni bili hiladi'mine gehepeve igi nenikisi nibili hililizado' lisihe' amuve lo gelo amilite godo'ne huli gala'muda igi gize'ne di veleta igi lohoto' zalo' nilidunu' nibililizave lo lo-ngedavo gili di ne'mine i-dani' ve laa' ani'. Ido' luhuvo nite' mene gizavo gamene ha'na ogo vamivo

bili hilani' noloseive. Luhuvo nite' lumola nene Babelonia meu' minine' alu ne'mo mese' aseka nolo-lingidive lo gizine'. Ido' mono' monovo gili lamine' iga' ave linge muki' nete ti' li laa' nave: Petolo' aza a'mine alumu' gizine' nene ei' minine' ebeku' Izesu' evenele zuho muliselo' lo molo gizine' ve. Ido' Babelonia ebekumu' line' nene gepe' gamazi Loma ebekumu' lo molo line' noloseive li laa' nave.

Ido' a'mine luhuvo nite' gizine' nene Izesu' evenele zuho Podo polovinisiukisi Galatia polovinisiukisi Kapadokia polovinisiukisi Asia polovinisiukisi ido' Bitinia polovinisiukisi mini'mi monangumu' gizine'. A'mine polovinisi muki' nene kanitili ma idise Teki (Turkey) ve laa' nouningu' minani' ve. Ido' luhuvo nite' gizingumu' nene nemu' gizuve lo gizamine'za a'mingu' gizine' gamaziloti' nene ti' lo gele none: A'mine luhuvo nite' gize-ngidive nene evene' malite goboni nimili-ngidave nete gohi amuzo mili goboni mili-ngidilisa nave lo gele mino monoku' mini gili' li minilizangumu' do amuzo molo-ngedelesa gizine' noloseive lo gele none. Ne'mine lo gelo laza Loma veti gizebo ve'ine naba gulive Nelo' aza ngamani gono' daa' avesi ido' ami pilisi ve'vesi lo-ngedavo ingine api' igi Izesu' evenele zuho numudo' namado' mini'mi monani' nene goboni mili-ngidi minani' gamene nene olihe alosa neivo nehe ido' mo ogavo nehe ne'mine gameneu' nene luhuvo nite' mene gizine' noloseive lo gele none. Ido' a'mine luhuvo nite' gizingu' nene Petolo' aza Izesu' evenele mene ti' lo lo-ngimine': Ingene

mulumo geni gihi nizani'za nesi nene ngolize izi minilizado' o neive. Ido' ne'mino ngolize izilizado' o neine' nene O'moso'mo no'noho' ize-ledo Okulumokuko inite' lamine' goloso salani molo-lede neingumu' nene ngolize izilizado' o neine' ve. Izesu' Kilisito'nimu' gili ele'vole' ani' nene do ningelesamu' a'mine mulumo geni nene gihilizave lo O'moso'mo gele ngimine' ve. Ido' gili ele'vole' ani' nenako ne'mo lukuvo nikevo Izesu' gohi tine' molo aline' gameneu' nene O'moso'mo gulive'ine do hozi loloseive. Monovo goloso'mi akalo' minadoti' huli monovo lamineli'mi akalo' minilizave lo Kilisito' aza helo vanise've dizo minine' lekine' nemu' gili minilizave lo longimine'. Mo O'moso'mi izipahala gehepeve lili' ikeni' nenako nemu' ingine gonou'ine nene ei' gulive di oti evene' li-ngimilizave. Izesu' evenele minamave nete Izesu' evenele zuho nene evene' goloso nizave laa' naha Izesu' evenele zuho ingine igi mili minilizani' monovo nene a'mine Izesu' evenele minamani' aleve nete engikumu' nene monovo laminekovo' daa' nave lilizado' di mili igi mili minilizave. Nemu' ingine gizebo ve'inelite gamazi'ine nene gili dalizave. Gizebo ve'inelite gonou' ve monovo lamine' i ngimamaa' nave nemukisi noluve. Monovo lamine' ilizangu' mulumo geniu' vilizani' nene O'moso'mo no'noho' ize-ngedeleseive. Nemu' nene Kilisito' gomu' molo ngemo okine' monovolo' nene e'meti ilizave line'. Di goloso gehepeve i-dangu' nesi Izesu' aza a'mida do velepe' izo gamazi lo ido' do goloso o-ngedamaa' ine'. Ne'mine lo Izesu' evenele zuho nene ele'ninge va'ninge minani' nete engi' minevo'

alevo'ningu' monovo igi mili minilizangumu' lo-ngimine'. Gohi ti' lo lo ga'ine ine': Lingine lu'ine mili hamo' igi ge luka neme ne lu'ne geme ido' ge hongu monovo o neme ne hongu monovo o geme li minilizave. Monovo goloso i-ngidaa' nave nene lu'ine ngimilizave. Monovo lamine' ilizangumu' evene' nete ma di goloso i-lingidamilizani'za ma ne'mine ilizani' nene O'moso'mi no'noho' dalizaze. Nemu' lingine lengehelele izamivo minilo. Lingine gili ele'vole' igi minaa' nani' nite' nene nanitekumu' gili ele'vole' iga' nave li longo' i-lingidilizave nene lutine laminetoti' lingimilizangumu' di va'va' igivo' minilo line'. Ido' gohi amuzo molo ti' lo lo-ngimine': Evenelite mulumo geni lingimilizani' nene monovo goloso angumu' minamilive. Kilisito' mulumo geni nogeho gala gelaa' ine' ne'mini gililizave. Ne'mine ikevo mulumo geni gihilizani' ne'mo lihime monovoloti' do olovo' o-ngede minelive line'. Ido' gohi ti' lo ga'ine dani': Inite' muki' osu' liline' gamene nene mo avito' ogaze. Nemu' O'mosola lii ge hize ele' o-nede ne hize ele' o gede lii ido' O'moso'mo dalizave lo amuzo lengeme neine' gono nene dalo line'. Asi've nene mono' muliselo' gizebo ve minine' nenako nemu' mono' muliselo' gizebo ve ingine gono'ine nene di guni dalizave lo lo-ngidine'. Inginge mukito' oko'ine di'mi limi minilizave lo lo-ngimine'. Mini'mi limi ve mali'mi gonou' ve ne'mini minaato' mini mili minilizave. Mini'mi limi minikevo O'moso'mo geni'ine hize ele' o-ngedelido' mini mili minilizave. O'moso aza engikumumu' gelaa' neine' nenako nemu' hize ele'

o-ngedeleseive.

Neloti' gohi ma ti' lo lo-ngimine': Satani aza do'mo leme-lengedelesa nomonize. Nemu' gizebo igi minilo lo ga'ine dani'. Ido' Izesu' evenele zuho numudo' namado' minani' nesi ingine a'mine hamo' geni nidani'za gamene ha'na minamunivo O'moso aza inite' do lisihe' o-lengedelesa aloseive line'.

Siluvano' ado' Aposolo' bukuu' Silasi' ve laa' ave aza a'mine luhuvo nite' gizuvongu' nene hize ele' o-nidive lo lo-ngemo ido' O'moso'mo do kegese-mikine' alu Babelonia ebeku' minine' ne'mo mese' aseka lo-ngidine' nene lo-ngemo ido' Maleko' mese' aseka lo-ngidine' nesi lo-ngimine'. (Mono' monovo gilaa' ave nete gilani' nene a'mine Babelonia ebeku' minine' alu ve line' nene Izesu' evenele zuho mulise Loma ebeku' minani' nemu' lo noloseive li gilani' ve.) Ne'mine lo luhuvo nite' ve nene no'noho' gamazitunu' gize osu' line'.

Petolo' Luhuvo Nite' Gizelesa Api' Ogo Gizaa' Gamazi Gizingu' No'noho' Gamazi Gize-ngidine' Gamazi

¹⁻² Izesu' Kilisito' aposolo minuve Petolo' naza lingine Izesu' Kilisito' gamazi've gili diivo' minilizangumu' ve losa ido' vanise've ne'mo noso ize-lengedo Kilisito' gelekele' ve lengele'mize molalingumu' ve losa ei' O'moso'mi Sikalahu've ne'mo nene do kekeize lo-lengedelive lo O'moso'mo gomukuti' vomine gele minido' e'meto do kegese-lengede neine' aleve lingine venenga ve ne'mine gili mini gamene li'nibemukovo' Podo misuboukisi

Galatia misuboukisi Kapadokia misuboukisi Asia misuboukisi ido' Bitinia misuboukisi mini'mi monave lengi' nene luhuvo nite' mene nogize-lingiduve. O'mosolati' nasahili' nesi ido' hongu lo lamino minaa' monovo nesi nene lengita mine vai' lo'mo vo miniliho.

O'moso'mo Leli' Mulumote Gelo Do Lu' Izo Minevo' Alevu' Lamine' Nene Okulumokuko Salani Molo-lede Neine' Nenako Nemu' Nene Lingine Idise Mulumo Geni Ato Atoli'mine Gihi Nizangukisi Longolize Naba Izi Minilizave Lo Petolo' Lo-ngimine' Gamazi

³ Ido' Guvetesi ve Izesu Kilisito' ei' O'moso've mino ei' meleho minive nene opo'ni lolone. Opo'ni lolone' nene ado' O'moso'mo mulumote naba gelosa lemeni dameni nene do gosoho' o-ledo gohi do soto' o-ledave. Ido' ne'mine o-lidine' nene laza minevo' alevu' lamine' daloningumu' upuhu' ogo gilingili ogo mino a'minemu' gele mu'musi' ogo none' akalo' nene lele'mize nomolosa lemeni dameni nene do gosoho' o-ledo gohi do soto' o-lidine' ve. Ido' ne'mine o-lidine' nene Izesu Kilisito' hilinguti' do ote-didi'mo nene ne'mine o-lidine' ve. ⁴ Ee, ido' ne'mine ine' nene aza Okulumokuko salani molo-lengede neine' inite' ado' geleso osu' lamaa' ido' goloso'vesi minamaa' ido' emeni dameni've gopo amo gosoho' laminekovo' minaa' inite' nene dalizangumu' ve losa lengemeni dameni do gosoho' o-lengedo gohi do soto' o-lengedave. ⁵ Ido' lingine a'mine salani molo neine' inite' dalizave noluvoni' nene lingine ezemu' gili ele'vole' igi minaa' nani' nemu' nene O'moso'mo do lungu' izelingumu' ve losa ei' amuzo've ne'mo

alete molo-lengede minaa' neingumu' nene noluve. Aza do lungu' izelesa do nene ogo neine' nene gamene nabala do soto' ogo mudise do lungu' izeleseive. ⁶ Nemu' nene lingine longolize izilizado' o neive. Ee, O'moso'mo gelavo idise nene gamene li'nibemu' mulumo geni ato ato' ma gihi nilizangukisi nene longolizevo' izi minilizado' o neive. ⁷ Ido' a'mine mulumo geni gihaa' ilizani' nene nanitekumu' ve. Lingine O'mosomu' gili ele'vole' igi minaa' nani' nene aza mo gihile lamine' nehe lo ne'mi monovo do soto' o-lengedelesa nene lengemengu' nomolave. Ido' evenelite gilavo ngoli ne'mo inite' mata' muki' ngivile' ogo inite' lamine' neiha ngoli nene ngoli lamine' nolihe li ningilisa oloku' gizikevo lo'votamo ha minaa' neiha alinge' ngoli nesi nene vo osu' loloseive. Lingine O'mosomu' gili ele'vole' igi minaa' nanitine nene gihile lamine' noline' nene mo ngoli nene ivile' goloso ivosa inite' naba neive. Nemu' nene ne'mino O'moso'mo lengemengu' molaa' ilidoti' gele ele'vole' ogatine gihile lamine' neine' nene soto' ogavo Izesu Kilisito' gohi soto' o lemeline' gamenela nene aza longopo'ni lo gulivetine do hozi lo do naba o-lengedelingumu' nene a'mine mulumo geni ato ato' nene gihaa' ilisave. ⁸ Izesu Kilisito'ni nene lingine mo ma ningamani'za lutine imi minikeve. Ido' idisesi mene oko'nolo' ma ningami nizangukisi nene ezemu' gili ele'vole' i mini lutingu' gulumo avile lisivo longolize izi minani' nene laza evenelitesi ngelo monovo ma lamolonido' o minine' longolize ado' Okulumokuti' atoli'mine ogo minine' ma

ne neive. ⁹ Ido' ne'mine igi longolize izi nizani' nene Kilisito'nimu' gili ele'vole' igi minani' ne'mi gihile've nene O'moso'mo lutine lukuvo emelido' mini mili nizani' nemu' nene lutingu' gulumo avile lisivosa longolize izi nizave.

¹⁰ O'moso'mo leli' lehize-ledelesa gele minine' nasahilikumu' li soto' ika' ika' iga' ave gozopo' minani' polohete nete nene a'mine a'me luvoni' gamazi ado' O'moso'mo lukuvo lemeline' nene nado lemelve li ne'mi monovomu' nene gelelone li vise' ika' ika' i'mi vi minani' ve. ¹¹ Ee, Kilisito' Sikalahu've ne'mo a'mine polohete engiku' omo mino Kilisito' mulumo geni ato ato' gehelingu-mukisi lo soto' ogo ido' ne'mine ilidoti' Guvelesi ve naba gehepeve lolo' ogo mineline' makilo' mine do dizelingumukisi lo soto' ine' nene a'mine polohete nete a'mine mulumo geni gehelive zaho nolive li ido' a'mine Sikalahuli'mo lo soto' ogo lolimine' inite' nene nani gamenelo' soto' ilizave li ne'mi monovo nene vise' ika' ika' iga' ani' ve. ¹² Vise' ikevo O'moso'mo ti' lo ngelebizine' ve: Inginge Kilisito' geheline' initekumu' li soto' igi gono dani' nene angise'inemu' dami asi lengikumu' dani' nene O'moso'mo ngelebizavo gilani' ve. Ido' a'mine Kilisito'nimu' lani' gamazi nene idise lingine mo giligeve. O'moso'mo Sikalahu' Okulumokuti' lelita imiseline' ne'mo do ote-ngedavo Kilisito'nimu' gamazi lamine' li soto' igi li-lingimave nete nene mo li soto' igi li-lingimikevo giligeve. Ido' a'mine li-lingimani' gamazi laminekumu' nene angelo' netesi nene ma ningo geleloinakoo li gili minaa' nave.

Monovo Golosolo' Minevo' Alevov' Igi Minanguti' Nene Kilisito' Vaniseli'mo Do Kuluhize-lingidingumu' Gili Mini O'moso Monovo Laminekovo' Ogo Minaa' Neine' Ne'mine Igi Lingine Monovo Laminekovo' Igi Minilo Lo Petolo' Ga'ine Dani' Gamazi

¹³ Ne'mine o neine' nenako nemu' nene lutine gatine nene gono dalido' di nene i-di mini lingine negi hizami monovotido' ha gizebo lamine' igi mini Izesu Kilisito' soto' o lemelido' nasahili' gohi o-ledelingumu' nene mudise gili mu'musi' i minisa minilo. ¹⁴ Lingine O'moso'mi izipahala mini ei' gamazi've gili dalizado' o neine' nenaze. Nemu' nene lingine gomu' ezemu' gilami haza minani' gamenela vomine lanite' gilaa' ani' inite' malo' nene gohi mini milamilo. ¹⁵⁻¹⁶ Asi mono' godolou' nene O'moso'mo line' gamazi ti' li gizi nizani' ve:

Naza nene monovo'ne golososi nomine' nouvoni' nenako nemu' nene linginesi monovotine golososi nomine' minilo.

Ido' ne'mine line' gizi nizani' nenako nemu' nene elese molo-lengedo do eita ive O'moso aza monovo goloso'vesi nomivo neine' ne'mine igi linginesi nene inite' mata' muki' igi mili ilizangu' nene monovotine golososi nomine' minilo.

¹⁷ Ido' lingine meteho ve li O'mosola laa' nani'za evene' muki' ize' molo-ledaa' iline' nene gopo evene' mala ninge lamine' o-ledoo mala ninge goloso o-lede minosa nene ize' molo-ledeline' nevoba asi leli' hamo hamo' nene ogo molo olonido' olonido' do molo meni lamine' lemelihe goloso lemelihe iline' nene mo a'mine o nolone' inite' lisihe' o nolidokovo'

nene lisihe' ogo golo hizo lemeleseive. Ne'mine iline' nenako lingine olihe goto' numudine Okulumokuko vi minami venenga ve gili me misubouko minilizani' gameneu' nene ezemu' lengehelele izivosa mini monovo lisihe' laminekovo' igi mili minilo. ¹⁸ Ido' ne'mine igi minilizani' nene lingine ti' li gili nizani' nemu' nene ne'mine igi minilisave. Lingine lengi' avotingidati' di minani' dingani monovo igi mili minanguti' nene do eita ogo meni hize-lingidine' nene me misubou' inite' hulupo eleline' siluva' nehe ngolimoni nehe nevo'mine inite' nedunu' nene meni hizine' nevoba ¹⁹ asi mo Kilisito' vanise've lamine' nedunu' meni hizine' ve. Ee, Kilisito' aza lihimetemu' belaa' nounge' sipisipi angale oko'nolo' inite' goloso hamokisi nomine' ne'mine lolo' ogo neivo biladoti' vanise've lamine' nedunu' nene meni hizine' ma neive. ²⁰ Ee, O'moso'mo me misubo nene olihe do soto' amosa gozopo' vomiloti' nene ne'mine ilingumu' ha mo ningo gele minine'za ha minosa alinge' gameneu' mene lengikumumu' ve losa do soto' o-dine' ve. ²¹ Ne'mine o-davo a'mine Kilisito' gono dadoti' nene lingine Kilisito' hilinguti' do ote-do do naba o-dive O'mosomu' nene gili ele'vole' ani' nene O'mosomu' neve nene gili ele'vole' igi ezemu' gili mu'musi' igi minaa' nave.

²² Lingine gamazi gihile di minadi'mo lutingu' monovo goloso minine' nene di huli lutine di guluvi' lisa lingine lengi' zuho Kilisito' evenele lutine ngimilizani' nene abeleni ami asi lutine ngimi gili' lilizado' nene lisihe' i nizaze. Mo lutine laminetoti' nene amuzo mili lutine ge

neme ne geme li minilo. ²³ Lingine nene lengemeni dameni gosoho' ogavo gohi soto' ani' ve. Ido' gohi soto' ani' nene helosa osu' lilive'mo zuho molavosa nevoba asi helosa osu' lamaa' neive'mo zuho molavosa gohi soto' ani' ma neive. Ee, minevo' minevo' ogo mino minevo' minevo' ogali'mi monovo do soto' o-ledaa' neine' inite' O'moso'mi gamazi ne'mo lengi' lutingu' gono dadoti' nene lengemeni dameni do gosoho' ogavo gohi soto' ani' ma neive. ²⁴ Ido' mene noluvoni' gamazi nene mono' godolou' ti' li gizi nizani' gamazilo' vo milise' o neivosa nene noluve: Evene' muki' leli' nene guvise navise ne'mine nene none.

Ido' leli' do soto' oga' nounge' inite' lamine' tamine' ato ato' muki' nene ha a'mine guvise naviseli'mi guvovo ne'mine nene neive.

Guvise nene ga'nuvo elo osu' lavosa guvovo've nene suludo'mozaa' neive.

²⁵ Ne'mine oga' neiha Guvelesi ve'mi gamazi nene mo ele'vole' ogo

minevo' minevo' ogovo' mineleseive.

Ido' a'mine Guvelesi ve'mi gamazi nene ado' a'mine li soto soto' igi li-lingimani' gamazi lamine' nene neive.

2

Lingine Monovo Goloso Hulisa O'moso'mi Gamazi'mo Amine Lingimivo Ido' Guvelesi Ve Nene O'moso'mi Numuno Do Amuzo Molo Minaa' Neine' Geheni Ne'mine Neivo Ido' Lengi' Nene A'mine Numuno'mi Geheni Lingela Ne'mine Mini

Ei' Evenele Gihile Gehepeve Minilo Lo Petolo' Longimine' Gamazi

¹ Nemu' nene lingine goloso monovo ato ato' muki' ado' evene' go'ine iza' ido' lutingu' monovo goloso haleko neivosa evene' lamine' gili monaa' ido' evene' maliti initekumu' lavodine lemavo muludingu' goloso gilaa' ido' gamazi di goloso igi laa' monovo ato ato' muki' nesi nene ogalone li mudise huli osu' lisa mini

² O'moso'mi gamazi ne'mo lute do naba ogavo lukuvo naloningumu' ve li izipe namunolite aminemu' ngisavo iga' nani' ne'mine igi lingine a'mine lutine'mi noso' nite' aminemu' nene lingisivosavo' minilo.

³ Ne'mine igi minilizave lo noluvoni' nene lingine Guvelesi ve'mo mulumote ningo do lamine' o-ledaa' neine' monovo've'mi lanite've ningi nigilani' nemu' nene noluve.

⁴ A'mine Guvelesi ve nene numuno gizaa' geheni sikalahu'vesi minine' ne'mine ne neive. Evene' nete ei' nene di ningisa goloso neive li di hulani'za O'moso'mo eikumu' gilivo dizo neivosa do kege-se-dine' nenaze. Eita nene igi gi'mizi minilo.

⁵ Ne'mine igisa lingine nene numuno gizaa' geheni sikalahu'vesi minine' ne'mine lili' igi minikevo O'moso'mo ei' Sikalahu've'mi numu've lolo' o-lengedelize. Guvelesi vela igi gi'mizilo. Ido' ne'mine igisa lingine O'moso'mi numungu' gono di-dilisa kekeize li minani' zuho lili' igi mono' numuno nabau' O'moso inite' lehizi-daa' ani' ne'mine igi O'moso'mo Izesu Kilisito' gono dangumu' gelosa ninge lamine' daline' inite' nene lengi' lutinguti' nene di soto' igi lehizidilizave.

⁶ Mene noluvoni' nene mo lamineto'

mono' godolou' O'moso'mo line' gamazi ti' li gizi
nizado' nene e'meto noluve:

Lingine gili'nalo.

Naza numuno gizaa' geheni mamu' nene giluvo
dize neivosa

a'mine geheni nene numuno do amuzo molaa'
geheni minelive losa

do kegeso neni' evene'ne zuhoti ebe'nine Zaioni
golo neu'

ado' engi' vovo'ningu' gehepeve nene nohulo-
duve.

Ido' ezemu' gili ele'vole' ilizave muki' nene
gili ele'vole' ilizani' ne'mi gihile nene soto' amivo
ngovoza ma hiamilisave.

⁷ Ido' a'mine geheni nene mo dizo neive nolu-
voni' nene lingine ezemu' gili ele'vole' i nizave
nene ezemu' gilavo dize neivosa nene noluha
evene' ma ezemu' gili ele'vole' amavela nene
mono' godolou' ti' li gizi nizani' gamazi malo'
nene mo gihile izave:

Numuno gizilizani' geheni mukikuti' nene geheni
ma

numuno gizaa' avelite ningisa goloso o vive li di
hulani' geheni ne'mo

geheni muki' ngivile' ogo numuno do amuzo
molaa' geheni lolo' ogave.

⁸ Ido' ma nene:

A'mine geheni nene evene' lodoho' izi limi pou'
li

ingalizani' geheni gehepeve ne neive.

Inginge lodoho' izi limi ingaa' nani' nene
O'moso'mi gamazi gili damadi'mo nene limi
ingaa' nave. O'moso'mo ingine mo ne'mine
ilizave lo gele neido' nene ne'mine iga' nave.

9 Ne neiha lingine neve nene mo O'moso'mo ei' ve lo do kegesine' zuho mini Guvesi ve naba'mi mono' gono di-di inite' lehizi-daa' aveliti muliseuti' mini O'moso'mo ei' ve lo do kekeize lo- lengede neine' zuho nene nizave. Ido' ne'mine nizani' nene vode vavo lehelele izeline' labana'veu' nene liti'musouti' elese molo-lengedo lengele'mize molavemu' nene opo'ni li guvele li soto soto' ilizangumu' nene ne'mine aveve nene nizave. 10 Gomu' lingine evene' numuno gulivetine minamivo gopo minani'za idise nene numuno gulivetine O'moso'mi evenele zuho ve lisa nene nizave. Gomu' nene O'moso'mo isete izo nasahili' o-ledaa' ine' monovo've nene lengita hetelamivo minani'za idise nene mo lengita ogo hetelavo a'mine'mi lulou' nene nizave.

Lingine Nene O'moso'mi Gelekele' Ve've Minii Monovo Lisihe' Laminekovo' Igi Mili Minikevo O'mosomu' Gilamave Nete A'mine Monovotine Lamine' Nene Ningisa O'moso Opo'ni Lilizado' Mini Mili Minilo Lo Lo-ngimine' Gamazi

11 Lingine lu'ne lengeme nouvoni' alevkizo, me misubou' aveve minami gamene li'nibemukovo' a'mida mene minilizani' nenako okodine'mo me misubou' initekumu' lanite' giline' nene gili hulilo. Okodine'mo ne'minemu' giline' ne'mo lutine nene ivile' olosa lovo o emaa' neinaze. Lingine gili hulilo lo nolo- lingiduve. 12 O'moso'mi evenele minamaveti zuhoti vovo'ningu' minilizangu' lingine igi mili ilizani' nene mo monovo lisihe' laminekovo' nene igi mili minilo. Ee, ingine lengikumu' evene' goloso ve li divi ledivi' i-lingidi laa' naha ne'mine

i-lingidi minilizangukisi monovo lamine' igi mili iga' ilizani' nene ningi mini' mini' ilizadi'mo O'moso'mo monovo'nido' ogo do ningeline' gamenelo' ingine nene a'mine monovote laminekumu' O'moso opo'ni lilizangumu' ve li monovo lisihe' laminekovo' igi mili minilo.

¹³ Guvelesi ve'mo ningivo lamine' ilingumu' ve li lingine evenelite amuzo ato' ngimani' aleve muki' nene gelekele' i-ngidivo' minilo. Ado' evene' linge muki' ngivile' ogo minive guvelesi ve naba gehepeve nolihe ¹⁴ ido' a'mine guvelesi ve naba ne'mo ingine evene' monovo goloso ilizave lihime ngemaa' gonosi ido' monovo lamine' ilizave ngopo'ni laa' gono nesi nene dalizave lo ngele'mize molave ngamani naba nilizahe muki' nene gelekele' i-ngidivo' minilo. ¹⁵ Ido' lingine gelekele' i-ngidivo' minilizave noluvoni' nene O'moso'mo ti' lo gele neingumu' nene noluve: Ado' lingine monovo lisihe' lamineto' e'meti minilizadi'mo evene' negi ado' gamazi monovo gilamavete divi ledivi' i-lingidaa' nave neti ve'nido' nene humo izi-ngidikevo gohi lamilisave lo gele neive. ¹⁶ Lingine Mose' louli'mi gesi mingu' mini nalato' ve gili minanguti' kuluhizi nizani'za a'mine louli'mo adelo' damivo fili o none' nenako nemu' nene monovo ato' ato' muki' nene lihime've nomivo gopo ha olosune lisa monovo goloso dikelizave. Ne'mine amilo. Asi O'moso'mi gelekele' ve mini ei' lulolokovo' igi mili minilo. ¹⁷ Ado' evene' mukikumumu' gilavo dizivo mini Kilisito' evenele leli' zuho muki' nene lutine ngimi mini O'mosomu' golise gili mini a'mine me misubou' guvetinesi ve naba minive

nene di naba i-di gili imi minilo.

*Gonou' Aleve Nene Gelekele' Igi Gono Lamine'
Di Minilizangu' Hazalo' Mulumo Gono Ma nGim-
ilizani' Nene Kilisito' Engikumu' Mulumo Gono
Ha Gihine' Monovo'velo' Nene E'meti A'mine Mu-
lumo Gono Nene Ha Gihilizangumu' Lo-ngimine'
Gamazi*

¹⁸ Gonolo' gipe alu lingine lengehelele gehepeve izivo mini metinge gizebo vetine nene gelekele' i-ngidivo' minilo. Ado' gizebo vetine ve lamine' hongu ve ne'mine minilizanikovo' gelekele' i-ngidi minilizavoba asi metinge gasava ve minilizani' nesi nene ha gelekele' i-ngidivo' minilo. ¹⁹ Ee, evene' ma inite' ma do goloso amilido' hazamu' mulumo gono imikevosa aza hongu lo mino a'mine mulumo nene O'mosomu' gele mino ha geheline' nene O'moso'mo ezemu' gelavo lamine' oloseive. ²⁰ Ne neiha lingine inite' ma di goloso ikevo a'minemu' lihime lingimi gavoso nilingibilavo lingine hongu li mini ha gihilizani' nemu' nene longopo'ni lilizado' minilizahe. O'ove. Longopo'ni lamilisani'za lingine inite' lisihe' lamine' ma ikevo gavoso nilingibilavo lingine hongu li ha gihilizani' nene O'moso'mo ningivo lamine' oloseive. ²¹ Ido' ne'mine ilizave lo noluvoni' nene O'moso'mo ne'mine ilizave lo elese molo lengele'mize molani' nenako nemu' noluve. Ido' O'moso'mo ne'mine ine' nene Kilisito' azasi lingine neni' ogo molo uvodo' api' napi' igi igi mili minilizave lo avazaha pikisa ne'mine bele molo lengito' medelo mulumo gono gihine' nenako nemu' nene O'moso'mo linginesi ne'mine ilizave losa elese

molo-lengedave. ²² A'mine ogo molo minido' api napi' igi e'metilizave Kilisito' aza nene lihime ma damine' ma neive. Ido' go'ine izo soza gamazi veleuti' livo evene' hamoli'mosi ma gelamine' ve.

²³ Evenelite divi ledivi' igi elemado' nene do velepe' izo aza a'mido' do goloso o-ngedo ngelemesa'mine' ve. Ido' mulumo nite' idado' nene golo hizo golise gililiza gamazi longedamo asi goni' do lisihe' ogovo' gelaa' ive O'moso'mi anaukovo' molosa ezelo' lehete o minaa' ine' ve. ²⁴ Ido' leli' nene lihime mudise hulisa monovo lisihe' laminekovo' igi mili minivi' alivi' ilizangumu' ve losa asi've nene leli' lihimete ei' oko'nolo' gehu a'minemu' nene lohoto' zalo' hiline' ve. Ei' biladi'mo lingine nene mo lamine' ikeve. ²⁵ Ido' naza ne'mine noluvoni' nene lingine sipisipi ize ne'mine mini vi gopo igi minani'za idise mini velepe' izi lengi' lutine'mi noso nite' eme'mo vo a'mido' gizebo o-lengedelivela igi gi'miziken'i nizani' nenako nemu' nene noluve.

3

Ele'ninge Va'ninge Lamini Minilizani' Monovomu' Petolo' Lo-ngimine' Gamazi

¹⁻² Ido' gomu' noluvoni' ne'mine igi vene' nete vadingine gelekele' i-ngidivo' minilo. Ee, ne'mine ikevo vadinge engikuti' linge ma Kilisito' gamazilo' gili dami nilizani' nene vene'ine lingine ha lengehelele izivo mini monovo goloso lengita nomivo monovo laminekovo' igi mili nizavo ingine a'mido' ningi mini' mini' ilizani'

ne'mo nene lingine gamazi li-ngimamavosi Kil-
 isito'nimu' gili ele'vole' igi eze zhouko ha di
 imine' mili minilizahe. Nemu' lengi' nene ha
 gelekele' i-ngidivo' minilo. ³ Ido' gonolisetine
 nene okodine losuvolo' mineline' inite' ado'
 madudine zopovo nalava izi di ma'mine ma'mine
 iga' nehe, ngolidunu' lili' ani' inite' nehe, oko-
 dido' inite' lamine' tamine' nehe, nevo'mine
 inite' neve nene minelivoba ⁴ asi lengemeni
 dameni lutinguko haleko minaa' neine' ado'
 hongu lo alaha' ogo minaa' lengemeni dameni
 ne'mo nene litehe elo osu' lamo gonolisetine
 gihile mineleseive. ⁵ Ee, ido' gomu' vom-
 ila O'mosola gi'mizi mini ezelo' gili mu'musi'
 igi minaa' ani' vene' nete nene lute'mi gono-
 lise've minelive li a'mine ne'mine monovolo'
 e'metisa va'ningida gelekele' i-ngidi minani' ne-
 nako lengitasi ne'mine monovotine mineline'
 nene lamine' oloseive. ⁶ Mene noluvoni' nene
 ado' Sala' aza Abalahamu'nimu' nenito' gizebo
 ve ve lo gamazi've gele do'mo vo minaa' ine'
 ma'minemu' nene noluve. Ido' lingine monovo
 laminetokovo' e'meti mini ne'mine mana'mine
 initekumu' golise gilami minilizani' nene ei'
 aluvo gidini mini ei' gili vani' minilisave.

⁷ Ido' va'ninge lingine eledinginemu'
 luvodi'mine ogo ti' lo nolo-lingimuve: Lingine
 nene O'mosola laa' olone' akate nene goloso
 ogalive li eledinginemu' nene ingine amuzo
 damani' mini lelitoti' nene limisa nizave li
 ngele'mize lamine' igi mini O'moso'mo lehize-
 ledavo minevo' alevo' oga' lemeni dameni nene
 engikisi lelikisi makato' dalonive ne nizave li
 ele'vole' i-ngidami asi gili nge li mini zou li

makato' lamini bizi minilo.

Monovo Lisihe' Lamineto' E'metilizadi'mo Mulumo Geni Gihilizani' Nene O'moso'mo Ninge Lamine' O-lengedeleseinaze. Lngine Monovo Laminekovo' Igi Mili Minilo Lo Petolo' Lo-ngimine' Gamazi

⁸ Naza gamazi lo osu' lo do vo no'novo molalosa ti' lo nolo-lingimuve: Lngine lutine gatine nene hamoli'minevo' minivosa minilo. Ido' ge mulumo'ne ninge-nede ne mulumoka ninge-gede lisavo' minilo. Ido' lengi' nene hamo' zuho nizanaze. Ge luka neme ne lu'ne geme lisavo' minilo. Ido' ezemu' mulunga hukivo hukivo gezemu' muluno hukivo hukivo lisavo' minilo. Ido' hokolize' ami okodine di'mi limivo' minilo. ⁹ Ido' lengi' di goloso nii-lingidavo ma a'mido' golo hizi di goloso i-ngidamilo. Ido' a'mine'mine igi lengi' nene gamazidunu' gizi'voti gamazi ma nili-lingidavo ma nene a'mido' golo hizi lngine gizi'voti li-ngidamilo. Asi O'moso'mo lengi' vise lo do eita ine' nene eitati' nene no'noho' dalizave losa ne'mine ine' nenako nemu' nene ne'mine nii-lingidavo ma a'mido' nene O'moso'mo no'noho' ize-lingidivo lisavo' nene li-ngimilo. ¹⁰ Mene nolo-lingimuvoni' gamazi neve nene mono' godolou' gamazi ti' li gizi nizani' malo' nene vo nodave:

Ve ma aza minevo' alevo've lamine' minivo laminekovo' mine do dizelesa gelelive nene vele'mo gamazi gosoho' nasaha' lo gamazi goloso lalive lo velelo' nene gizebo lamine' ilive.

11 Ido' monovo golosomu' nene olovo' o mino
monovo laminekovo' ilive.

Ido' hongu lo lamino minaa' monovomu' nene
vise' ogo

imisele do vo dalive.

12 Ee, Guvesi ve'mi vele nene evene' lisi-
hetokovo' hulo mino
gizebo o-ngedo mino

ezemu' lilizani' gamazi nene gelelesa gapepe' o
minaa' neiha

evene' monovo goloso daa' avela nene gololo'
ninge-ngedo minaa' neine' nenako

nemu' nene a'mine minevo' alevo' lamineku'
minelesa geelive nene

a'mine meuko luvoni' ne'mine nene ilido' o
neive.

13 Ido' lingine monovo laminekovo' igi mili
ilisa amuzo mili minilizani' nene evenelite ma di
goloso i-lingidilizado' o neihe. Mo o'ove. 14 Ne
neiha monovo lamine' igi mili ilizangumukisi
mulumo gono ma gihi-lingidilizani' nene
O'moso'mo ninge lamine' o-lengedeleseinako
lamine' oloseive. Lingine evenelite lengehelele
izeline' inite' i-lingidilizani' nene muludine
badavo golise gilamilo. 15 Kilisito' nene lengi'
lutine'mi Guvesi ve minelive li ele'mizi
milalo. Ido' lingine Kilisito'nimu' gili mu'musi'
i nizangumu' evenelite longo' i-lingidika' i-
lingidika' ilizado' nene a'mine gili mu'musi'
i nizani' ne'mi monovo nene li ngolo' li li-
ngimilizado' di va'va' ikisavo' minilo. 16 Ido'
ne'mine igi li-ngimili ma nene humedame ami
hongu gamazi laminekovo' li-ngimilo. Ido'
lingine Kilisito' evenelite ilizado' o neine'

monovo lamine' igi mili minaa' naangumu' divi ledivi' igi laa' nave nene a'mine lengemenga langumu' nene ngovozi hililizangumu' ve li monovo lisihe' lamine' gehepeve neive li lutingu' gili nizadokovo' nene e'meti minilo. ¹⁷ Ido' O'moso'mo gelavo lingine mulumo geni gihilizado' o noline' nene lingine monovo laminekovo' e'metilizado' a'mine mulumo geni gihilizani' nene lamine' oloseiha lingine mulumo geni gihilizani' nene mo monovo goloso dalizado' gihilizani' neve nene mo goloso oloseive.

Kilisito' Aza Ve Lisihe' Mino Monovo Goloso Ogo Molo Amine'za Leli' Lihimetemu' Mulumo Geni Geho Helosa Gohi Oto Okulumokuko Dizo Neive Lo Lo-ngimine' Gamazi

¹⁸ Ee, Kilisito' azasi nene mulumo alumo gelo hiline' ve. Aza nene ve lisihe' minine'za O'mosola do bize-ledelesa evene' goloso leli' lihimetemu' lelito' medelo hiline' ve. Ido' a'mine gamene hamokovo' hiline' a'ne'mo nene leli' mukiliti lihimete nene mo osu' lilido' vo dani' ve. Aza neve nene evene' leli' okode ne'minesi neivosa nene bili hilani'za sikalahu've nene O'moso'mo do upuhu' o-davo vele gizosa ¹⁹ a'mine sikalahu've nesi mino nene vo nala' numungu' minani' sikalahu' nene mono' lo-ngimine' ve. ²⁰ A'mine mono' lo-ngimine' sikalahu' nene gomu' Noa' minine' gameneu' Noa' aza sipi lolo' neivo O'moso'mo evene' engikumu' izebolo' molavo geto ngebelamo ha gizebo o minine' gameneu' eze gamazi gili hulave engi' nene mono' lo-ngimine' ve. A'mine sипiu' nene evene' ngomosi' eiti a'ne'minevo' dizikevo O'moso'mo nosodunu'

do ngu' izine' ve. ²¹ Ido' a'mine noso velo ani' nene noso holaali'mi avazaha ne'mine nene soto' ine' ve. Ee, noso hilaa' naadoti' nene O'moso'mo do lungu' izaa' neive. Ido' noso hola' nune' nene okodelo' goloduvo gilite-ledelive losa nevoba asi O'moso'mo lute do guluvi' loledavo guluvikovo' lo minaa' ilive losa ezela lo noso holaa' nune. Ido' a'mine O'moso'mo do lungu' izaa' neine' nene Izesu' Kilisito' hilinguti' otidi'mo ve losa do lungu' izaa' neive. ²² Ido' Kilisito' ei' neve nene idise Okulumokuko dizo O'mosoloti' lemo mino ana hulaa' idaa neivo angelo' nesi ido' ato' amuzo'inesi mini'mi monani' nesi nene gizeneuko limi gelekele' i-di nizavosa gizebo o-ngede neive.

4

Kilisito' Oko'nolo' Mulumo Geni Gihidi'mino Lazasi Gehelone Liisa Lihime Daa' Monovo Ato Ato' Nene Hulii O'moso'mi Lulolokovo' Igi Mili Nizavo Hililizani' Gamene Ilive Lo Petolo' Longimine' Gamazi

¹ Nemu' nene Kilisito' oko'nolo' mulumo geni gihidi'mine igi linginesi mulumo geni gihilizangumu' nene lutine gatine di amuzo mili di va'va' igisa minilo. Nene nanitekumu' ve. Ve ma oko'nolo' mulumo geni gehe nolive aza lihime daa' monovo nene mo hulosa noloseinako nemu' nene noluve. ² Ido' ne'mine ma ilizani' nene idise meloti' nene haza okodesi minevo' alevu' o'mo dizelone' gameneu' nene haza alevete lanite' gilaa' naani' monovo nene laza gohi amo asi O'moso'mi lulolokovo' ogo molo minelone lisa ne'mine ilizani' o neive. ³ Ee,

gomu' lingine O'moso'mi evenele minamave heta ato' velite ngumo helaa' ine' monovo goloso igi mili'mi dizani' nene mo moda ve lo noluze. Gohi amilo. A'mine goloso monovo nene ado' ne'mine mana'mine monovo goloso longovozo hilami gopo iga', inite' goloso mamu' lutine otaa', nosolo' moni sipaki goloso iga', noso' nite' naba ni zohi' igi noso ni sipaki iga' ido' noso naa' pati di soto' iga' ido' soza o'moso nge'metaa' monovo goloso iga' ani' mamu' nene noluze. Mo hulilo. ⁴ Lingine a'mine heta ato' vesi nene a'mine monovo golosou' nene vili vivi' vivi' igi minani' ma'mine nene gohi amavo ingine ningi upuho' igi lengi' nene divi ledivi' igi lengemenga laa' nave. ⁵ Ne neiha a'mine engi' nene vetesi ha nonivesi hilavesi monovotemu' goni' o-ledo ize' molo-ledelesa do va'va' o neive ne'mo nene ne'mine angumu' nene lingine nanitekumu' ave lo goni' o-ngedo lihime ngemeleseive. ⁶ Nemu' nene mono' gamazi lamine' nene hilavetidasi vo heteline' ve. Inginge haza oko'inesi minani' gameneu' nene O'moso'mo evene' muki' o-ledaa' neine' ne'mino engikisi goni' o-ngedo lihime ngemavo hilani'za ingine sikalahu'inesi mini O'moso'mo minevo' minevo' oga' neidi'mine igi minivi' minivi' ilizangumu' ve losa a'mine mono' gamazi lamine' nene engitasi hulavo vo heteline' ve.

*O'moso'mo Nasahili' O-ledo Lehize-lede
Neine' Amuzo Nene Gele nGe Lo Mino Ogo Molo
Oloningumu' Petolo' Line' Gamazi*

⁷ Ido' inite' mata' muki' osu' liline' gamene nene mo avito' ogaze. Lingine nene O'mosola

lilizado' lisihe' i minilizangumu' nene lutine gatine gopo amivo di vevesi minilo. ⁸ Lute ngemaa' monovolo' e'metilizave nete nene evenelite di goloso i-ngidilizani' lihime muki' nene di halekisavo' apasi-ngidilizani' nenako nemu' nene lingine igi mili ilizani' inite' mukikuti' ma dizo neine' nene lingine lutine ge neme ne geme li minilisa nene amuzo mili igi mili minilo. ⁹ Ido' evene' numudingu' alizangumu' nene lingine nulu nulunga li lihiteheka lami numudingu' numudingu' nene ne do lamine' o-gede ge do lamine' o-nede lisavo' minilo. ¹⁰ O'moso'mo lengi' nene nasahili' o-lengedo gono daa' amuzo ato ato' vai' nene lehize-lengede neize. A'mine lehize-lingidine' amuzolo' nene gizebo lamine' igi minilizangisi lingine hamo hamo' a'mine di nizani' amuzodunu' nene ge hize ele' o-nede ne hize ele' o-gede li minilo. ¹¹ Ado' mono' lo-lengemelive neve nene O'mosolo' medelo mino ei' O'moso'mi gamazi'vevo' nene lo-lengemelive. Ido' nasahili' ogo hize ele' gono do-lengedelive neve nene O'moso'mo amuzo emaa' neine' votigilelo' nene do molo a'mine gono nene do-lengedelive. Ido' ne'mine ilizani' nene lingine Izesu' Kilisito' hize ele' o-lidivo laza olone' inite' mata' mukitoti' nene O'moso'mi gulive nene do naba o-delone lisa nene ne'mine ilizave. Ezela nene guvesi ido' amuzo nesi nene mo minevo' minevo' ogovo' minelive. Mo ne'mino minilihoo.

*Izesu Kilisitodo' Gi'mizi Nizavo Mulumo Geni
Gihilingidilizangumu' Nene Upuho' Igi Olovo' Ami
Longolize Izi Mini Monovo Lamine' I'mi Vi Mini*

O'mosolo' Lehete' I Minilizave Lo Petolo' Longimine' Gamazi

¹² Lu'ne lengeme nouvoni' alevékizo, lutine do ningelesa lengemengu' molo ololi'mo longolaa' neine' ne'mino mulumo geni gihi-lingidilisa naavo lengi' soto' o-lengedelesa neingumu' nene lingine leli' soto' o-ledamilido' o neine' inite' atoli'mine ma soto' o-ledelesa neihe li upuho' amilo. ¹³ Asi Kilisito' mulumo geni gihine' ne'mine nene linginesi gihi nilizani' nenako nemu' nene lingine Kilisito' labana'vesi gohi soto' iline' gameneu' nene luteu' gulumo avile lisivo mino lolize naba izeloningumu' ve li longolize izi minilo. ¹⁴ Ido' lingine Kilisito' evenele lili' igi eze gulive di minangumu' lingilimaa' navo ma nene guvelesi neine' O'moso'mi Sikalahu' neve nene lengito' omo mino mine do viline' nenako nemu' nene lingine longolize izi minilizado' o neive. ¹⁵ Ido' lengikuti' linge ma mulumo gono gihi-lingidilizani' nene lingine evene' ma ngibili hililizahe ido' gumine damine ilizahe ido' monovo goloso atoli'mine ilizahe ido' evene' maliti initeku' gavakavato' monaa' ilizahe ilizadoti' mulumo gono lingimilizani' nene mo edamoloseize. A'ne'mine monovo nene mo amilo. ¹⁶ Ne neiha evene' ma aza Kilisiteni lolo' ogo minelingumu' mulumo geni inite' gihi-dilizani' nemu' nene ovozo helamo asi Kilisiteni gulive've miningumu' nene O'moso do naba odo minelive. ¹⁷ Ne'mine mana'mine monovolo' e'meti minilizave lo meuko noluvoni' nene O'moso'mo eze evenele zuho gonito' lele'mize molo-ledeline' gamene mo alitingumu' nene noluve. Ido' ei' evenele lelitoti' api' ogo evene'

lihime lengeme'mo viline' nene aizo, alinge' nela eze gamazi've laminekumu' gili ele'vole' amave goni' o-ngedo lihime ngemo do nadi' o-ngedelido' o minelivoo. Mo mulumo gono goloso gehepeve ngemeline' o noloseive. ¹⁸ A'mine neve nene mono' godolou' ti' li gizi nizado' nene vo do neive: O'moso'mo evene' lisihe' lamine' do lu' izelesa nene

ge'nebe ogosa do lu' iza' neine' nenako O'moso mehe'ine imi lihimelo' monaa' ave nene lukuvo nalizado' o neihe. Mo keke' ngeli lukuvosi ma namilisave.

¹⁹ Nemu' nene O'moso'mi lulolo' evene' ma mulumo geni gihi nilizave engi' minevo' alevo'ine nene engi' do soto' o-ngidive ado' gamazi've lavo haza ma osa'mive ei' anau' miliki eito' lehete' i mini monovo lamineto' nene e'meti minilizado' o neive.

5

Petolo' Ga'ine Dani' Gamazi Gizingu' Mene Mono' Gizebo Ve Inginge Evene'nido' Gizebo Lamine' I-ngidilizani' Monovomu' Lo-ngimine' Gamazi

¹ Ido' lengikuti' mono' gizebo vetine minavemu' nene gamazi lolouze. Gililo. Lengi' ne'mine gizebo ve minuve ado' Kilisito' mulumo geni gehe'mo navo ningaa' ido' alinge' soto' o-ledelesa neine' inite' lamine' labana'vesi neine' nene makato' dalonivesi minuve naza gatine do ti' lo nolo-lingimuve: ² Lengita O'moso'mi zuho mulise nizani' neve nene lu'ine'mi noso' nite' ngimika ngimika' igi gizebo lamine' i-ngidi minilo. Ne'mine i-ngidi minilizani' nene

evenelite lutingu' hizavosa nevoba asi lutine'mo ne'mine olosa gele nolidokovo' nene e'meti ilo. Ido' ma nene moni heneni inite' ma dalone li gili minisa gizebo i-ngidilizani' ne'mo nene lovozo helaa' inite' goloso ilisaze. Mo ne'mine ami asi O'moso'mo lingine a'mine gonomu' lutine mili minisa gono dalizave lo gele neido' nene e'meti gono dalo. ³ Ido' gohi ma nene ti' lo nolo-lingimuve: A'mine gizebo i-ngidi nilizani' aleve nene amuzo mala' mala' igi gizebo i-ngidami asi O'moso'mi zuho engi' igi mili minilizani' inite' nene lingine avazaha pikisa ne'mine mini aka ngelebizi igi mili minilo. ⁴ Ne'mine ikevo gizebo ve naba aza soto' ogo heteleline' gameneu' nene lingine meni dalisave. Ado' geleso osu' lamiline' palaisi labana'vesi neine' nene dalisave.

Goso've Nene Gizebo Ve Gili nGimi Nizavo Evene' Muki' Oko'ine Di'mi Limisavo' Mini Kil- isito'nimu' Gili Ele'vole' Ani' Nene Di Gili' Li Mini Satani Lovo I Imi Minilizangumu' Lo-ngimine' Gamazi

⁵ Ido' mono' gizebo ve gono'ine neivo ha iga' naani' ne'mine igi goso'velite ilizani' o neine' inite' nesi nene mo ne'mino neive: Lingine nene gizebo vetinelite lilizani' gamazilo' nene ha gili ngimisa minilo. Ido' mono' godolou' O'moso'mi monovo ma ti' li gizi nizani' ma neive:

Evene' ma oko'ine di dizi minaa' nave nene
O'moso'mo biluva' o-ngedaa' neiha

evene' ma engi' oko'ine di'mi limi minaa' nave
engi' nene

ninge lamine' o-ngedo nasahili' o-ngedaa' neive.

Aza ne'mine oga' neine' nenako nemu' nene evene' muki' lingine okodine di'mi limi mini ge gelekele' o-nede ne gelekele' o-gede li minilo. ⁶ Ido' O'moso neve nene ne'mine oga' neine' nenako nemu' nene lingine ei' molani' gamene soto' ilingu' nene do ote-ledelingumu' ve li lengi' okodine nene di'mi limisa O'moso'mi anau' vi mini ei' amuzo've nabalokovo' nene lehete i minisa ⁷ O'moso'mo lengikumumu' mulumotine gele minaa' neine' nenako nemu' nene lingine gopo gatine gilaa' nani' initetine geni ne'mine vai' nene ei' anau' huli milalo.

⁸ Lingine nene lutine gatine vo gopo'napa amivo gatine gili nge li mini ehe' igi ningisa minilo. Ado' biluvatine Satani aza loposo gulo naba laioni ne'mo ga'na helo ngebelo naline' initekumu' viseto' monaa' neine' ne'mino lenge-belelesa nomonize. Ningisa minilo. ⁹ Mulumo geni lengi' nigihi-lingidani' ne'mino nene lengi' zuho Kilisito' evenele misubo vaiku' mini'mi monave engikisi nene a'mine'mine igi nigihi-ngidani' nenako lingine nemu' gili mini Kilisito'nimu' gele ele'vole' iga' nani' nene di gili' li minisa a'mine biluvatine nene lovo i imivo' minilo. ¹⁰ Ne'mine igi a'mine mulumo geni nene gihi'mi vi nizavosa gamene ha'na amivo a'mine ato ato' initeku' mulumote ningo nasahili' o-ledaa' ive O'moso ado' Kilisitoda vi gi'mizisa labana'vesi minevo' minevo' oga' neine' mo'mosiku' nene imi hilalizave lo lengi' vise lo do eita ive ne'mo nene gohi do lamine' o-lengedo do ngi lo-lengedo ido' amuzo lengemo ele'vole' igi oti pehe li minilizado' lengele'mize

molaloseive. ¹¹ Amuzo muki' nene gamene gamene eitavo' minivo. Mo ne'mino minilihoo.

Petolo' Luhuvo Nite' Gize Osu' Nolo nGopo'ni Lo Gize' Gamazi

¹² Naza gamazi noluvo ezelo' gele medele minelodo' o neive lo giluve ado' leze zuho Siluvano' ne'mo hize ele' o-nedo luhuvo mene nogizivo naza a'mine gamazi noluvoni' meve nene O'moso'mo nasahili' o-ledaa' neine' monovo gihile'mi gamazi ve lo lo-lengemelesa naza hize ele' ogosa lengi' lutine nene do ngi lo-lengedo luhuvo nite' li'nibe mene nogize-lingiduze. A'mine O'moso'mi nasahiliku' nene mini gili' li minilo.

¹³ Ido' lengi' ne'mine aleve O'moso'mo maka' do kegeselingidive Kilisito' evenele Babelonia numuno ebeku' mela mulise milaa' nave ingine longopo'ni nilavoo neze gipe'ne Maleko' azasi nene longopo'ni nolize. ¹⁴ Lingine nene isetine ve li lute ngemaa' monovo di soto' igi ge nabuti' ize ne gabuti' ize li adido' disa minaa' ilo.

Hongu lo lamino minaa' monovo neve nene Kilisito' evenele minave lengi' mukita minivo.

Moda a'nesi' ve.

MONO' GODOLO GOSOHO'
The New Testament in the Dano (Upper Asaro)
language of Papua New Guinea
Nupela Testamen long tokples Dano (Upper Asaro)
long Niugini

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 11 Nov 2022 from source files dated 9 Oct 2020

76c78bc1-63e6-5f61-a363-169051cfe72e